

**Atuagaq una Ilaqutariinnermut, Inatsisinillu
Atuutsitsinnermut Naalakkersuisoqarfimmik
suleqateqarluni saqqummersinneqarpoq**



Ataata isertitsivimmiippoq

© Amalia Lynge Pedersen, Christian Fleischer Rex & milik publishing, 2014

Allattoq: Amalia Lynge Pedersen
Assiliartalersornera: Christian Fleischer Rex
Ilusilersuineq: Nuisi grafik
Naqiterneqarfia: Clemenstrykkeriet, Danmark


Saqqummersitaq siulleq, naqinnera siulleq
ISBN 978-87-92790-47-7

AMALIA LYNGE PEDERSEN

Ataata isertitsivimmiippoq

Assiliartalersuisoq

CHRISTIAN FLEISCHER REX



milik




INERSIMASUMUT SIULEQUT

Atuagaq una atuffassissutaavoq paquminarsinnaasunik imaqartoq, kiisalu oqaloqatigiinnermik aallarniissutitut atugassaalluni. Atuagaq pinerluuteqarsimanerup kingorna pineqaatissinneqarsimasunut isertitsivimmiinnermik tamatumalu kingunerisinnaasaanik sammisaqarpoq.

Atuffassininni imaassinnaavoq meeraq arlaatigut qisuariartoq, taamaammat tamanna ammaffigiuk, qulequtaasumullu tunngasumik arlaannik oqaasertaliiniarsinnaaneramik ikorfartorlugu.

Atuakkap atuareernerata kingorna meeraq apeqqutissaqassappat imaluunniit eqqarsaamminik misigissutsimigulluunniit arlaatigut anitassaqassagaluarpat ikiornissaa piareersimaffigiuk. Taamaattoqartarnera nalinginnaasuvoq, oqaloqatigiinnerlu tamatigut ajunngitsumik kinguneqartarpoq tamassi pisuunnguallaatigisinnaasassinnik.

Sofus qulingiluanik ukioqarpoq, nukaa Aqqaluartaa sisamanik ukioqarluni aleqaalu Uiloq aqqaneq-marlunnik ukioqarluni. Anaana kommunip allaffiani suliffeqarpoq. Ataataat siornali Kujataanut kuultisoriartorluni aallariaarsimavoq.





Sofusip ataatani maqaasiummerlugu qatanngutini oqarfigai:
“Ilaa ataatap tikinnissaa qilanaarnaq? Qatanngutai sikisarlutik
anngaapput, Sofusilli anaanani takusinnaavaa allamut
saasartoq, soorlumi isumaqataarpasinnani. Sofusi eqqarsarpoq
immaqaasiit anaanap ataata qatsullugu soqutigiunnaarsimagaa.
Soorlu taamani ataata piniartuugallarmat aallaqattaartarluni?
Ilaanniuna immaqa avikkusuttaraa? Immaqa ataata
aallaqqasarpallaaqimmat? Taamanimi ataatap piniartutut
allagartani pigiunnaarmagu, anaana nuannaarluni
oqarnikuuvoq kiisami tassa ataata aallaqattaarunnaassasoq.

Aqqaluartaa nuannaarpasinnani oqarpoq: “Ataata anaanaluk
maqaasisarpakka. Inersimasut meeqqanut aalleraangata ataata
ujartarpara, immaqa ataatap tulliani tikikkuni aassavaanga.”

Taamani Sofusikkut ataataat kuultisioriartorluni aallarami meeqqat oqarasuaatikkut inuulluaqquai. Anaana oqarpoq tassangaannaq aallartariaqarsimasoq suliffittaarsimanini peqqutigalugu. Sofusip ataatani ilagerusullugu oqarsimavoq, namminerooq aamma kuultinik nassaarusukkami. Nangilluni oqarpoq anaanani kusanartumik ujamiliuukkusullugu. Anaanami kisimiilluni meeqqat, suliffini angerlarsimaffitsillu isumagalugit ilungersorpasilluni inuuneqarmat tunerusuttaraluarpaa.



Anaami ilungersorpasittarpoq. Ilaanni nerisassat akiligassallu akilernissaannut angummassinnaarpiarneq ajorpoq. Sipaartaqaaq, ilaatigullu ajakkut igaaminnik pajuttarpat imaluunniit neriartortittarlugit, iffukkaminnullu angerlaleraangata tunisarlugit.

Aanaa Røde Korsip atornikuerniarfiani ilaannikkut sulisarpoq, sulillatuaraangallu ilaqtariit akikitsunik ajoquteqanngivissunillu atisarsiniartarput.



Sofusip tamanna nuannarisaqaa, tassami aanaa qaqutigut takusaramikku, aamma taakani Anders And-bladit nutaanngitsut ingilluni isiginnaartaramigit. Uilup aanani aamma nuannaartorisaqaa. Aanaammi arnat allat ilagalugit atornikuerniarfik nuannersumik kusanartumillu ammatittarpaat.



Ullut arlaanni Sofusip anaanani aperaa: "Soormi ataatap kuultinik nassaarsimaguni nassittarunisigut, taava illit taamarsuaq ilungersussanngikkaluarputit?"

Anaana ikasarpalulluni akivoq: "Sofusi, ullut arlaanni ataatap kuultiinnarmik illuliuukkumaarpaatigut," illakululluni torsuusamut anillakkiartorpoq, errortat manisivimmut maniertorniarlugit.

Sofusip aleqaata qatanngutini akulikitsumik paarisarpai. Anaanami suliffimmi saniatigut unnukkut nerereeraangamik allamut suliartoqqittarpoq. Ilagerusuttaraluarpaat, kisianni anaana oqartarpoq suliassani naammassipallanniassagamigit ilagisinnaanagit. Aleqap ikiorumallugu oqartaraluarpoq anaana angerlapallanniassammat. Anaanali oqartarpoq suliani oqimaattarmata arlaannaallunniit ilagisinnaanagu.

Uilup tamanna nuannarisangikkaluarpaa, misigissutsinili
eqqarsaatinilu manngertisarluni toqqorniartarpai,
piviusuutinnaveersaartarlugillu. Tamatigulli iluatsittanngilaa,
ilaatigummi kisimiilluni qiasarpoq, qullinilu nakkaasut
eqqarsartarpoq tassaasut diamantit tungujortut -
diamantimmi tungujortut, aligoqqiit, akisoorujussuupput
qaqutigortuullutillu.

